

Inatsisartut Suleriaasianni § 33, imm. 3, nr. 1 naapertorlugu Nunat Avannarliit Killiit Siunnersuisoqatigiiffianni aallartitanut Siulittaasup aalajangiiffigisassatut siunnersuut manna saqqummiuppaa:

Nunat Avannarliit Killiit Siunnersuisoqatigiiffiata kaammattuutit aalajangersagaanut nr. 1/2021-mut Inatsisartut tapersiinissaat pillugu Inatsisartut aalajangiiffigisassaattut siunnersuut:

**Avatangiisinut silap allanngoriartorneranullu ataatsimoorussamik iliuseqarnissaq suleqatigiinnerulernissarlu anguniarlugit Savalimmiut Naalakkersuisuisa, Islandip Naalakkersuisuisa aamma Kalaallit Nunaanni Naalakkersuiusut Nunat Avannarliit Killiit Siunnersuisoqatigiiffiata kaammattorpai.**

**Nalinginnaasumik ukiumut ikinnerpaamik ataasiarluni avatangiisinut silap allanngoriartorneranullu nunani naalakkersuisuisa ataatsimeeqatigiittarnissaat Nunat Avannarliit Killiit Siunnersuisoqatigiiffiata kammattuutigaa. Ukiumoortumik ataatsimiinneerit siunertaraat nunat avannarliit killiit suleqatigiinnerisa siuarsarneqarnissat aamma avatangiisinut silap allanngorneranullu sammivilinnik oqaloqatigiittarnissaq, isumassarsianillu paarlaasseqatigiittarnissaq, ilisimasanik assigisaanillu paarlaasseqatigiittarnissaq.**

(Aallartitat Siulittaasuat Pipaluk Lynge-Rasmussen)

### **Tunngavilersuut:**

Inuiassuit qaangerniagassaat annerpaaq tassaavoq silap allanngoriartornera. Issittumi silap kissatsikkiartornera nunarsuup sinneranit marloriaataasoq kissakkiartornerlu ingerlaannartoq sumiiffimmi innuttaasunut malunnaateqarluartumik sunniuteqartussaasoq ilisimatuussutsikkut misissuinerit takutippaat.

Nunat avannarlerni killerni nunat silap allanngoriartornera malugivaat, taamaammat pingaaruteqarpoq Nunat avannarlerni killerni pinngortitamik avatangiisinillu nungusaataanngitsumik atuinermik illersuinermillu tunngaveqartumik nunat ingerlaavartumik qitiusumillu inissimanisaat. Nunani avannarlerni killerni avatangiisinut silap allanngoriartorneranullu soqutigisaqatigiiffinni ataatsimoorussaqaqarnerup sumiiffimmi ineriartornermut anginerusumik sunniuteqarsinnaaneq nunat pingasuusut naalakkersuinikkut sunniuteqarsinnaanerannik annertusaassaaq.

Ataavartunik nukissiuuteqarnermut ikaarsaariartornermut assersuutigalugu nungusaataanngitsunik aalisarnermi, assartuussinerni takornialerinerinilu avatangiisinut asattuussisuni Kalaallit Nunaat, Savalimmiut Islandilu akunnerminni ilikkagaqarluarsinnaapput isumassarsilluarsinnaassallutillu.

Nunat avannarliit killiit siunnersuisoqatigiiffiata inooqatigiinnikkut aningaasarsiornikkullu ineriartortuarnissaq silap allanngoriartorneranut atatillugu iliuusissanut aamma ataavartunik nukissiuuteqarnermut ikaarsaariartornermi ingerlaqatigiissinnaanerit Nunat Avannarliit Killiit Siunnersuisoqatigiiffiata ukiumi suliffigisassami 2021-22-mi pingaarnertut samminiarpai. Naalagaaffiit Peqatigiit nungusaataanngitsumik ineriartornissamut Nunarsuarmioqatigiinnut anguniagassiaat tunngavigalugit Nunat Avannarliit Killiit Siunnersuisoqatigiiffiata nunat naalakkersuisui sammisamut suleqatiseriniarpai pingaartissallugulu innuttaasut aamma Nunat avannarliit killiit inuusuttaasa akuutinneqarnissaat.

Januar 2022-mi Islandimi Nunat Avannarliit Killerni silap allanngorneranut aamma ataavartunik nukissiuuteqarnermut ikaarsaarinarinnissamut sammisaqarluni ataatsimeersuarnissamut avatangiisinut silallu pissusaanut nunat pineqartut ministerii Nunat Avannarliit Killiit Siunnersuisoqatigiiffiata aggersarpai. Sammisaqarluni ataatsimeersuarneq ministerinut suleqatigiinnissamik isumaqatigiissuteqarnissamik kiisalu aallarniutaasumik ministerit ataatsimiinnissaannut pitsaasumik periarfissiisaaq.

Nunat Avannarliit Killiit ministeriini assigiinngitsunik oqartussaaffeqartuni, assersuutigalugu peqqinnissamut aamma kulturimut ministeriusut suleqatigiinnertik ingerlatsiinnarniarlugu isumaqatigiissuteqarput, ukiumoortumik ataatsimiinnerni suleqatigiissutigisassat pingaarnertigussaasumik piffissalersorneqarnissaallu pilersaarusiorneqartarput. Isumaqatigiissusiornissanut maanna isumaqatigissutaareersut tunngavigalugit suliarineqarsinnaapput. Sammisaqarfinnut aalajangersimasunut piffissani aalajangersimasuni suliaqartussanik suleqatigiissusiornernut ataatsimiititaliornernulluunniit ataqatigiissaarinerup nukittorsakkap kingunerisinnaavai.